

四庫全書

史部

欽定四庫全書

春秋戰國異辭卷四十一

右春坊右諭德陳厚耀撰

田齊

襄王

襄王既立立太史氏女為王后是為君王后生子建太
史敫曰女不取媒因自嫁非吾種也汙吾世終身不覩
君王后君王后賢不以不覩故失人子之禮

史田齊
世家

燕既盡降齊城唯獨莒即墨不下燕軍聞齊王在莒并兵攻之淖齒既殺湣王於莒因堅守距燕軍數年不下燕引兵東圍即墨即墨大夫出與戰敗死城中相與推

田單

田單者齊諸田疏屬也湣王時單為臨淄市掾不見知及燕使樂毅破齊湣王出奔已而保莒城田

單走安平令其宗人盡斷其車軸末而傅鉄籠已而燕軍攻安平城壞齊人走爭塗以轄折車敗為燕所虜唯田單宗人以鉄籠故得脫東保即墨曰安平之戰田單宗人以鉄籠得全

習兵立以為將軍以即墨距燕頃之燕昭王卒惠王立與樂毅有隙田單聞之乃縱反間於燕宣言曰齊王已

死城之不拔者二耳樂毅畏誅而不敢歸以伐齊為名
實欲連兵南面而王齊齊人未附故且緩攻即墨以待
其事齊人所懼惟恐他將之來即墨殘矣燕王以為然
使騎劫代樂毅樂毅因歸趙燕人士卒怨而田單乃令
城中人食必祭其先祖於庭飛鳥悉翔舞城中下食燕
人怪之田單因宣言曰神來下教我乃令城中人曰當
有神人為我師有一卒曰臣可以為師乎因反走田單
乃起引還東向坐師事之卒曰臣欺君誠無能也田單

曰子勿言也因師之每出約束必稱神師乃宣言曰吾
惟懼燕軍之剽所得齊卒置之前行與我戰即墨敗矣
燕人聞之如其言城中人見齊諸降者盡剽皆怒堅守
惟恐見得單又縱反間曰吾懼燕人掘吾城外塚墓
先人可為寒心燕軍盡掘壘墓燒死人即墨人從城上
望見皆涕泣其欲出戰怒自十倍田單知士卒之可用
乃身操版挿與士卒分功妻妾編於行伍之間盡散飲
食享士令甲卒皆伏使老弱女子乘城遣使約降於燕

燕軍皆呼萬歲田單又收民金得千鎰令即墨富豪遺燕將曰即墨即降願無虜掠吾族家妻妾令安堵燕將大喜許之燕軍由此益懈田單乃收城中得千餘牛為絳繒衣畫以五彩龍文束兵刃于其角而灌脂束葦於尾燒其端鑿城數十穴夜縱牛壯士五千人隨其後牛尾熟怒而奔燕軍燕軍夜大驚牛尾炬火光明炫燿燕軍視之皆龍文所觸盡死傷五千人因銜枚擊之而城中鼓譟從之老弱皆擊銅器為聲聲動天地燕軍大駭

敗走齊人遂殺其將騎劫燕軍擾亂奔走齊人追亡逐北所過城邑皆畔燕而歸田單兵日益多乘勝卒至河上而齊七十餘城皆復為齊乃迎襄王於莒襄王在莒五年入臨淄而聽政襄王封田單號曰安平君

史田單傳

田單為齊上將軍興師十萬將以攻翟往見魯仲連子仲連子曰將軍之攻翟必不能下矣田將軍曰單以五里之城十里之郭復齊之國何為攻翟不能下去上車不與言決攻翟三月而不能下齊嬰免諛之曰大冠如

箕長劍柱頤攻翟不能下壘于梧丘于是田將軍恐駭
往見仲連子曰先生何以知單之攻翟不能下也仲連
子曰夫將軍在即墨之時坐則織簣立則杖耒為士卒
倡曰宗廟亡矣魂魄喪矣歸何黨矣故將有死之心士
卒無生之氣今將軍東有掖邑之封西有淄上之寶金
銀黃帶馳騁乎淄澠之間是以樂生而惡死也田將軍
明日結髮徑立矢石之所乃引枹而鼓之翟人下之

說苑

指武

齊襄王立而孟嘗君中立為諸侯無所屬齊襄王新立
畏孟嘗君與連和復親薛公文卒諡為孟嘗君諸子爭
立而齊魏共滅薛孟嘗絕嗣無後

史孟嘗
君傳

荀卿趙人年五十始來游學於齊騶衍之術迂大而閎
辨奭也文具難施淳于髡久與處時有得善言故齊人

曰談天衍雕龍奭炙轂過髡

一本談天衍上
有天口騶三字

田駢之屬

皆已死齊襄王時而荀卿最為老師齊尚脩列大夫之

缺而荀卿三為祭酒焉

史荀
卿傳

魯仲連者齊人也好奇偉倣儻之策而不肯仕官任職
好持高節游於趙趙孝成王時秦使白起破長平軍東
圍邯鄲魏王使客將軍新垣衍間入邯鄲

新國策作辛

欲

尊秦王為帝仲連聞之乃見平原君曰

語詳國策

新垣衍不

敢復言帝秦

史魯連傳

齊狐逐者即墨之女也狀甚醜三逐于鄉五逐于里齊
相婦亡造襄王之門而求見王輟食而起左右曰王何
貴此女王曰子不識也夫牛鳴而馬不應者異類故也

其人必有異者遂見與之語女曰夫屋堅不堅在乎柱
國家安不安在乎相王曰吾國相若何對曰王之國相
比目之魚也外比內比然後能成其事王曰何謂對曰
明其左右賢其妻子是外比內比也王曰善遂尊其相
以逐女妻之居三月四方之士多歸于齊而國以大治

列女
傳

十四年秦擊我剛壽

史田齊世家

十九年襄王卒子建立

史田齊世家

王建

王建立六年秦攻趙齊楚救之秦計曰齊楚救趙親則退兵不親遂攻之趙無食請粟於齊齊不聽周子曰不如聽之以退秦兵不聽則秦兵不却是秦之計中而齊楚之計過也且趙之於齊楚扞蔽也猶齒之有脣也脣亡則齒寒今日亡趙明日患及齊楚且救趙之務宜若奉漏甕沃焦釜也夫救趙高義也却秦兵顯名也義救亡國威却強秦之兵不務為此而務愛粟為國計者過

矣齊王勿聽秦破趙於長平四十餘萬遂圍邯鄲

田齊世家

十六年秦滅周 君王后卒

古今注齊王后忿而死變為蟬登庭樹嚙喉而鳴故

世名蟬曰齊女也

二十八年王入朝秦秦王政置酒咸陽

三十八年燕使荊軻刺秦王秦王覺殺軻明年秦破燕

燕王走遼東明年秦滅魏秦兵次於厯下

四十二年秦滅楚明年虜代王嘉滅燕王喜

王建四十四年秦兵擊齊齊王聽相后勝計不戰以兵

降秦秦虜王建遷之共遂滅齊為郡始君王后賢事秦
謹與諸侯信齊亦東邊海上秦日夜攻三晉燕楚五國
各自救以故王建立四十餘年不受兵君王后死后勝
相齊多受秦間金多使賓客入秦秦又多予金客皆為
反間勸王去從朝秦不修攻戰之備不助五國攻秦秦
以故得滅五國五國已亡秦兵卒入臨淄民莫敢格者
王建遂降遷於共故齊人怨王建不早與諸侯合從攻
秦聽姦臣賓客以亡其國歌之曰松耶栢耶住建共者

客耶疾建用客之不詳也

以上史田齊世家

雜錄

三國伐齊圍平陸

三國韓魏趙也

括子以報於牛子曰三國之

地不接於我踰隣國而圍平陸利不足貪也然則求名

於我也請以齊侯往牛子以為善括子出無害子入

三子皆齊

臣牛子以括子言告無害子無害子曰異乎臣之所聞

牛子曰國危而不安患結而不解何謂貴智無害子曰

臣聞之有裂壤土以安社稷者有殺身破家以存其國

者不聞出其君以為封疆者牛子不聽無害子之言而用括子之計三國之兵罷而平陸之地存自此之後括

子日以疏無害子日以進

淮南子人間

宗衛相齊遇逐罷歸舍名門尉田饒等二十有七人而問焉曰士大夫誰能與我赴諸侯者乎田饒等皆伏而不對宗衛曰何士大夫之易得而難用也饒對曰非士大夫之難用也是君不能用也宗衛曰不能用士大夫何若田饒對曰厨中有臭肉則門下無死士今夫三升

之糴不足於士而君雁鷺有餘粟紈素綺繡靡麗堂楮從風而弊而士曾不得以緣衣果園梨栗後宮婦人撫以相撻而士曾不得一嘗且夫財者君之所輕也死者士之所重也君不能用所輕之財而欲使士致所重之死豈不難乎哉于是宗衛面有慚色逡巡避席而謝曰此衛之過也

說苑尊賢
新序作燕相

宋燕相齊見逐罷歸之舍召門尉陳饒等二十六人曰諸大夫有能與我赴諸侯者乎陳饒等皆伏而不對宋

燕曰悲乎哉何士大夫易得而難用也饒曰君勿能用也則有不平之心是失之已而責諸人也宋燕曰夫失諸已而責諸人者何陳饒曰三斗之糴不足於士而君雁鶩有餘粟是君之一過也果園梨栗後宮婦人以相提擲士曾不得一嘗是君之二過也綾紈綺縠靡麗於堂從風而弊士曾不得以為緣是君之三過也且夫財者君之所輕也死者士之所重也君不能行君之所輕而欲使士致其所重猶鈇刀畜之而干將用之不亦難

乎宋燕面有慚色逡巡避席曰燕之過也

韓詩卷七

齊壯子請攻越問於和子和子曰先君有遺令曰無攻

越越猛虎也莊子曰雖猛虎也而今已死矣和子曰以

告鶚子

鶚子齊相

鶚子曰已死矣以為生

為民所說故猶以為生

凡舉

事必先審民心然後可舉

呂覽順民

成驩謂齊王曰王太仁太不忍人王曰太仁太不忍人

非善名耶對曰此人臣之善也非人主之所行也夫人

臣必仁而後可與謀不忍人而後可近也不仁則不可

與謀忍人則不可近也王曰然則寡人安所太仁安不忍人對曰王太忍於薛公而太不忍於諸田太仁薛公則大臣無重太不忍諸田則父兄犯法大臣無重則兵弱於外父兄犯法則政亂於內此亡國之本也韓子內儲上齊中大夫有夷射者御飲於王醉甚而出倚於郎門門者則跪請曰足下無意賜之餘漚乎夷射曰叱去刑餘之人何事乃敢乞飲長者則跪走退及夷射去則跪因捐水郎門雷下類溺者之狀明日王出而訶之曰誰溺

於是刎跪對曰臣不見也雖然昨日中大夫夷射立於

此王因誅夷射而殺之

韓子內儲下

造父為齊王駙駕以渴服馬百日而服成請效駕齊王
王曰效駕於圃中造父驅車入圃渴馬見圃池去車走

池駕敗造父不能禁

韓子外儲右

客有為齊王畫者齊王問曰畫孰最難者曰犬馬難孰
易者曰鬼魅最易犬馬人所知也旦暮罄於前不可類
之故難鬼神無形者不罄於前故易之也

韓子外儲左

齊有居士田仲者宋人屈穀見之曰穀聞先生之義不
恃仰人而食今穀有樹瓠之道堅如石厚而無竅獻之
仲曰夫瓠所貴者謂其可以盛也今厚而無竅則不可
剖以盛物而任重如堅石則不可以剖而以斟吾無以
瓠為也曰然穀將以欲棄之今先生不恃仰人而食亦
無益人之國亦堅瓠之類也

堅瓠喻務光卞隨鮑焦墨翟之類韓子外儲左

齊王厚送女欲妻屠牛吐

牛一作門

屠牛吐辭以疾其友曰

子終死腥臭之肆而已乎何為辭之吐應之曰其女醜

其友曰子何以知之吐曰吾以屠知之其友曰何謂也吐曰吾肉善如量而去若少耳吾肉不善雖以他附益之尚猶不售今厚送子子醜故耳友後見之果醜傳曰

目如擗杏齒如編貝

韓詩卷九

越甲至齊雍門子狄請死之齊王曰鼓鐸之聲未聞夫石未交長兵未接子何務死之為人臣之禮邪雍門子狄對曰臣聞之昔者王田于囿左轂鳴車右請死之王曰子為何死車右對曰為其鳴吾君也王曰左轂鳴者

工師之罪也子何事之有焉車右曰臣不見工師之乘而見其鳴吾君也遂刎頸而死誠有之乎齊王曰有之雍門子狄曰今越甲至其鳴吾君也豈左轂之下哉車右可以死左轂而臣獨不可以死越甲也遂刎頸而死是日越人引甲而退七十里曰齊王有臣鈞如雍門子狄擬使越社稷不血食遂引甲而歸齊王葬雍門子狄

以上卿之禮

說苑
立節

齊將軍田贖出將張生郊送曰昔者堯讓許由以天下

洗耳而不受將軍知之乎曰唯然知之伯夷叔齊辭諸侯之位而不為將軍知之乎曰唯然知之於陵仲子辭三公之位而傭為人灌園將軍知之乎曰唯然知之智過去君弟變姓名免為庶人將軍知之乎曰唯然知之孫叔敖三去相而不悔將軍知之乎曰唯然知之此五大夫者名辭之而實羞之今將軍方吞一國之權提鼓擁旗被堅執銳旋回十萬之師擅斧鉞之誅慎毋以士之所羞者驕士田贖曰今日諸君皆為贖祖道具酒脯

而先生獨教之以聖人之大道謹聞命

說苑尊賢

齊王起九重之臺募國中能畫者賜之錢有敬君居常饑寒其妻妙色敬君工畫貪賜畫臺去家日久思憶其妻畫像向之而笑傍人見以白王王召問之對曰有妻如此去家日久心常念之竊畫其像以慰離心不悟上

聞

說苑

子奇年十八齊君使之治阿既行矣悔之使使追之未到阿及之還之已到弗還也使者及之而不還君問其

故對曰臣見其所共載者白首也夫以老者之智以幼者決之必能治阿矣是以不還既而魏起兵擊阿邑人父率子兄率弟以私兵戰立破魏師

新序

齊有貧士命其狗為富命其子為樂方將祭入於空叱之曰富出祝曰不祥家果有禍長子死哭之曰樂乎而不自悲也

尸子

東海有勇士菑川訢過神泉飲馬其僕曰飲馬此者馬必致死飲馬果沉訢拔劍而入三日三夜殺二蛟而出

雷神隨而擊之眇其左目

韓非子

齊女徐吾者東海上貧婦人其鄰婦李吾之屬合燭夜績徐最貧而燭不屬李吾曰徐吾燭數不屬請無與夜績徐吾曰妾以貧故起常先去常後洒掃陳席以待來者坐常處下為貧故也今一室之中益一人燭不為益明去一人燭不為益閭何愛東壁餘光莫之能應遂復


與夜績

列女傳

說苑 楚使使聘於齊齊王饗之梧宮使者曰大哉

梧乎王曰江漢之魚吞舟大國之樹必巨使何怪焉
使者曰昔燕攻齊遵雒路渡濟橋焚雍門擊其左而
虛其右王歟絕頸而死於杜山公孫差格死於龍門
飲馬乎淄澠定獲乎琅琊王與太后奔於莒逃於城
陽之間當此之時則梧之大何如乎王曰陳先生對
之陳子曰臣不如刁勃王曰刁先生應之刁勃曰使
者問梧之年邪昔者荆平王為無道加諸申氏殺子
胥父與其兄子胥被髮乞食於吳闔閭以為將相三

年將吳兵復讎乎楚戰勝乎栢舉級頭百萬囊瓦奔
鄭王保於隨引師入郢軍行乎郢之都子胥親射宮
門掘平王塚笞其墳數以其罪曰吾先人無罪而子
殺之士卒人加百焉然後止當若此時梧可以為其
柩矣



春秋戰國異辭卷四十一

欽定四庫全書

史部

春秋戰國異辭卷四十二

詳校官編修_臣曹錫齡

編修_臣裴謙覆勘

總校官庶吉士_臣倉聖脉

校對官中書_臣李斯咏

謄錄監生_臣馮國柄

欽定四庫全書

春秋戰國異辭卷四十二

右春坊右諭德陳厚耀撰

魏

史魏世家魏之先畢公高之後也畢公高與周同
姓武王之伐紂而高封於畢於是為畢姓其後絕
封為庶人或在中國或在夷狄其苗裔曰畢萬事
晉獻公獻公之十六年滅魏

鄭玄詩譜云魏姬姓之國武王伐紂而封

馬以封畢萬為大夫卜偃曰畢萬之後必大矣萬滿數也魏大名也以是始賞天開之矣天子曰兆民諸侯曰萬民今命之大以從滿數其必有衆畢萬封十一年晉獻公卒四子爭更立晉亂而畢萬之世彌大從其國名為魏氏生武子名畢事晉公子重耳晉獻公之二十一年武子從重耳出亡十九年反重耳立為晉文公而令魏武子襲魏氏之後封列為大夫治於魏生悼子魏悼子徙治霍生魏

絳魏絳事晉悼公悼公任魏絳政使和戎翟戎翟
親附賜之樂三讓然後受之徙治安邑魏絳卒諡
為昭子生魏羸羸生魏獻子獻子事晉昭公昭公
卒而六卿強公室卑晉頃公之十二年韓宣子老
魏獻子為國政晉宗室祁氏羊舌氏相惡六卿誅
之盡取其邑為十縣六卿各令其子為之大夫獻
子與趙簡子中行文子范獻子並為晉卿其後十
四歲而孔子相魯後四歲趙簡子以晉陽之亂也

而與韓魏共攻范中行氏魏獻子生魏侈

襄子魏侈

與趙鞅共攻范中行氏魏侈之孫曰魏桓子與魏

康子趙襄子共伐滅知伯分其地桓子之孫曰文

侯都

都一作斯

世本畢萬生芒季芒季生武仲州武仲生莊子

絳莊子生獻子荼獻子生簡子取取生襄子多襄

子生桓子駒桓子生文侯斯

世次與史記不同

文侯

文侯元年秦靈公之元年也與韓武子趙桓子周威王

同時

史魏世家

六年城少梁

史魏世家

八年復城少梁

史記年表

十三年使子擊圍繁龐出其民

史魏世家

十六年伐秦築臨晉元里

史魏世家

十七年伐中山使子擊守之趙倉唐傅之西攻秦至鄭

而還築雒陰合陽

史魏世家

魏將樂羊攻中山其子執在城中城中縣其子以示樂羊樂羊曰君臣之義不得以子為私攻之愈急中山因烹其子而遺之鼎羹與其首樂羊循而泣之曰是吾子已為使者跪而啜三杯使者歸報中山曰是伏約死節者也不可忍也遂降之為魏文侯大開地有功自此之後日以不信

淮南子人間又說苑貴德語稍畧與國策小異

地志

靈壽

樂羊為魏將伐中山文侯封之靈壽子孫因

家焉樂毅其後也

韓子

說林

樂羊為魏將而攻中山其子在中山中山之

君烹其子而遺之羹樂羊坐於幕下而啜之盡一盃
文侯謂堵師贊曰樂羊以我故而食其子之肉答曰
其子而食之且誰不食樂羊罷中山文侯賞其功而
疑其心

魏攻中山樂羊將已得中山還反報文侯有貴功之色
文侯知之命主書曰羣臣賓客所獻書者操以進之主
書舉兩篋以進令將軍視之盡難攻中山之事也將軍

還走北面再拜曰中山之舉非臣之力君之功也

說苑復思

又呂覽樂成

史

樂毅傳

初樂羊為魏文侯將伐取中山魏文侯封樂

羊以靈壽樂羊死葬於靈壽其後子孫因家焉中山復國至趙武靈王時復滅中山

文侯受子夏經藝客段干木過其閭未嘗不軾也秦嘗欲伐衛或曰魏君賢人是禮國人稱仁上下和同未可圖也文侯由此得譽於諸侯任西門豹守鄴而河內稱

治史魏
世家

魏文侯謂李克曰先生嘗教寡人曰家貧則思良妻國

亂則思良相今所置非成則璜

文侯弟名成璜一作黃

二子何如

李克對曰臣聞之卑不謀尊疎不謀戚臣在闕門之外

不敢當命文侯曰先生臨事勿讓李克曰君不察故也

居視其所親富視其所與達視其所舉窮視其所不為

貧視其所不取五者足以定之矣何待克哉文侯曰先

生就舍寡人之相定矣李克趨而出過翟璜之家翟璜

曰今者聞君召先生而卜相果誰為之李克曰魏成子
為相矣翟璜忿然作色曰以耳目之所覩記臣何負於
魏成子西河之守臣之所進也君內以鄴為憂臣進西
門豹君謀欲伐中山臣進樂羊中山已拔無使守之臣
進先生君之子無傳臣進屈侯鮒韓詩屈侯鮒作趙蒼臣何負於
魏成子李克曰子之言克於子之君者豈將比周以求
大官哉君問而置相非成則璜二子何如克對曰君不
察故也居視其所親富視其所與達視其所舉窮視其

所不為貧視其所不取五者足以定之矣是以知魏成子之為相也且子安得與魏成子比乎魏成子食祿千鍾什九在外什一在內是以東得卜子夏田子方段干木此三人者君皆師之子之所進五人者君皆臣之子惡得與魏成子比也翟璜逡巡再拜曰璜鄙人也失對

願卒為弟子

史魏世家

又韓詩卷二畧同

漢書儒

魏文侯相

說苑

臣術

魏文侯且置相召李克而問焉曰寡人將置

相置於季成子與翟觸我孰置而可李克曰臣聞之
賤不謀貴外不謀內疎不謀親如臣疎賤不敢聞命
文侯曰此國事也願與先生臨事而勿辭李克曰君
不察故也可知矣貴視其所舉富視其所與貧視其
所不取窮視其所不為由此觀之可知矣文侯曰先
生出矣寡人之相定矣李克出過翟璜翟璜問曰吾
聞君問相於先生未知果孰為相李克曰季成子為
相翟璜作色不悅曰觸失望於先生李克曰子何遽

失望於我我於子之君也豈與我比周而求大官哉
君問相於我臣對曰君不察故也貴視其所舉富視
其所與貧視其所不取窮視其所不為由此觀之可
知也君曰出矣寡人之相定矣以是知季成子為相
翟璜不說曰觸何遽不為相乎西河之守觸所任也
計事內史觸所任也王欲攻中山吾進樂羊無使治
之臣吾進先生無使傳其子吾進屈侯附觸何負於
季成子李克曰不知季成子季成子食采千鍾什九

居外一居中是以東得卜子夏田子方段干木彼其所舉人主之師也子之所舉人臣之才也翟黃迂然而慚曰觸失對於先生請自修然後學言未卒而左右言季成子立為相矣於是翟璜默然變色內慚不敢出三月

呂覽

舉難

魏文侯弟曰季成友曰翟璜文侯欲相之而

未決以問李克李克對曰君欲置相則問樂騰與王孫苟端孰賢文侯曰善以王孫苟端為不肖翟璜進

之以樂騰為賢季成進之故相季成

又新序卷四
樂騰作樂商

韓子

內儲下

翟璜魏王之臣也而善於韓乃召韓兵與

之攻魏因請為魏王構之以自重也

二十一年魏韓趙列為諸侯

二十四年秦伐我至陽狐

二十五年子擊生子瑩

以上魏世家

卜子夏衛人孔子沒退居西河教授為魏文侯師梁之

東北鄉有愛子鎮相傳即其哭子處

廣輿記山西云今太原府文水

縣有隱泉山一名陶
山卜子夏嘗隱此

子夏作壤室編蓬戶彈琴瑟其中以歌先王之風

尚書大傳

禮記

魏文侯問於子夏曰吾端冕而聽古樂則唯

恐卧聽鄭衛之音則不知倦敢問古樂之如彼何也

新樂之如此何也子夏對曰今夫古樂進旅退旅和

正以廣弦匏笙簧會守拊鼓始奏以文復亂以武治

亂以相訊疾以雅君子於是語於是道古修身及家

平均天下此古樂之發也今夫新樂進俯退俯姦聲

以濫溺而不止及優侏儻擾雜子女不知父子樂終不可以語不可以道古此新樂之發也今君之所問者樂也所好者音也夫樂者與音相近而不同文侯曰敢問何如子夏對曰夫古者天地順而四時當民有德而五穀昌疾疢不作而無妖祥此之謂大當然後聖人作為父子君臣以為紀綱紀綱既正天下大定天下大定然後正六律和五聲弦歌詩頌此之謂德音德音之謂樂詩云莫其德音其德克明克明克

類克長克君王此大邦克順克俾俾於文王其德靡
悔既受帝祉施于孫子此之謂也今君之所好者其
溺音乎文侯曰敢問溺音何從出也子夏對曰鄭音
好濫淫志宋音燕女溺志衛音趨數煩志齊音敖辟
喬志此四者皆淫於色而害於德是以祭祀弗用也
詩云肅雝和鳴先祖是聽夫肅肅敬也雝雝和也夫
敬以和何事不行為人君者謹其所好惡而已矣君
好之則臣為之上行之則民從之詩云誘民孔易此

之謂也然後聖人作為鞀鼓控楬壎篪此六者德音之音也然後鐘磬竽瑟以和之干戚旄狄以舞之此所以祭先王之廟也所以獻酬酢也所以官序貴賤各得其宜也所以示後世有尊卑長幼之序也鐘磬鏗鏗以立號號以立橫橫以立武君子聽鐘聲則思武臣石聲磬磬以立辨辨以致死君子聽磬聲則思死封疆之臣絲聲哀哀以立廉廉以立志君子聽琴瑟之聲則思志義之臣竹聲濫濫以立會會以聚

衆君子聽竽笙簫管之聲則思畜聚之臣鼓鼙之聲
謹謹以立動動以進衆君子聽鼓鼙之聲則思將帥之

臣君子之聽音非聽其鏗鏘而已也彼亦有所合之也

魏文侯與田子方語有兩僮子衣青白衣

青白衣一作錦衣

而

侍於君前子方曰此君之寵子乎文侯曰非也其父死
於戰此其幼孤也寡人收之子方曰臣以君之賊心為
足矣今滋甚君之寵此子也又且以誰之父殺之乎文
侯愍然曰寡人受令矣自是以後兵革不用

說苑復恩

公季成謂魏文侯曰田子方雖賢人然而非有土之君也君常與之齊禮假有賢於子方者君又何以加之文侯曰如子方者非成所得議也子方仁人也仁人也者國之寶也智士也者國之器也博通士也者國之尊也故國有仁人則羣臣不爭國有智士則無四隣諸侯之患國有博通之士則人主尊固非成之所議也公季成自退於郊三日請罪

新序
卷四

田子顏自大術至乎平陵城下見人子問其父見人父

問其子田子方曰其以平陵反乎吾聞行於內然後施

於外子顏欲使其衆甚矣後果以平陵叛

說苑權謀

高士傳 東郭順子魏人也修道守真田子方師事

之而為魏文侯師友侍坐于文侯數稱谿工文侯曰

谿工子之師耶子方曰非也無擇

田子方名

之里人也稱

道數當故無擇稱之文侯曰然則子無師耶子方曰

有文侯曰子師誰耶子方曰東郭順子也文侯曰然

則夫子何故未嘗稱之子方曰其為人也真人貌而

天虛緣而葆真清而容物物無道則正容以悟之使
人之意自消無擇何足以稱之子方出文侯曰遠哉
全德之君子始吾以聖智之言仁義之行為至矣吾
聞子方之師吾形解而不欲動口鉗而不欲言吾所
學者真主梗耳夫魏直為我累耳

又莊子
田子方

田子方從齊之魏望翟璜乘軒騎駕出方以為文侯也
移車異路而避之則翟璜也方問曰子奚乘是車也曰
君謀欲伐中山臣薦翟角而謀得果伐之臣薦樂羊而

中山拔得中山憂欲治之臣薦李克而中山治是以君賜此車方曰寵之稱功尚薄

田子方渡西河造翟璜翟璜乘軒車載華蓋黃金之勒約鎮簾席如此者其駟八十乘子方望之以為人君也道狹下抵車而待之翟璜至而睹其子方也下車而趨自投下風曰觸田子方曰子與吾嚮者望子疑以爲人君也子至而人臣也將何以至此乎翟璜對曰此皆君之所以賜臣也積三十歲故至於此時以閒

暇祖之曠野正逢先生子方曰何子賜車輦之厚也
翟璜對曰昔者西河無守臣進吳起而西河之外寧
鄴無令臣進西門豹而魏無趙患酸棗無令臣進北
門可而魏無齊憂魏欲攻中山臣進樂羊而中山拔
魏無使治之臣臣進李克而魏國大治是以進此五
大夫者爵祿倍以故至於此子方曰可子勉之矣魏
國之相不去子而之他矣翟璜對曰君母弟有公孫
季成者進子夏而君師之進段干木而君友之進先

生而君敬之彼其所進師也友也所敬者也臣之所
進者皆守職守祿之臣也何以至魏國相乎子方曰
吾聞身賢者賢也能進賢亦賢也子之五舉者盡賢
子勉之矣子終其次也

說苑
臣術

田子方出見老馬於道喟然有志焉以問於御者曰
此何馬也曰故公家畜也罷而不為用故出而鬻之
田子方曰少而貪其力老而棄其身仁者不為也東

帛而贖之窮士聞之歸心焉

韓詩卷八
淮南子人間

高士傳 段干木者晉人也少貧且賤心志不遂乃
治清節遊西河師事卜子夏與田子方李克翟璜吳
起等居於魏皆為將唯干木守道不仕魏文侯欲見
就造其門段干木踰牆而避文侯文侯以客禮待之
出過其廬而軾其僕問曰干木布衣也君軾其廬不
亦甚乎文侯曰段干木賢者也不移勢利懷君子之
道隱處窮巷聲馳千里吾敢不軾乎干木先乎德寡
人先乎勢干木富乎義寡人富乎財勢不若德貴財

不若義高又請為相不肯後卑已固請見與語文侯
立倦不敢息夫文侯名過齊桓公者蓋能尊段干木
敬卜子夏友田子方故也

魏文侯過段干木之閭而軾之其僕曰君胡為軾曰此
非段干木之閭歟段干木蓋賢者也吾安敢不軾且吾
聞段干木未嘗肯以已易寡人也吾安敢驕之段干木
光乎德寡人光乎地地一作勢段干木富乎義寡人富乎財
地不如德財不如義其僕曰然則君何不相之於是君

請相之段干木不肯受乃致祿百萬而時往館之於是
國人皆喜相與誦之曰吾君好正段干木之敬吾君好
忠段干木之隆居無幾何秦興兵欲攻魏司馬唐且諫
秦君曰段干木賢者也而魏禮之天下莫不聞無乃不
可加兵乎秦君以為然乃按兵輟不敢攻

呂覽期賢
又新序卷五

又淮南子修務語稍
別司馬唐且作司馬唐

呂覽尊師段干木晉國之大駟也學於子夏

子擊逢文侯之師田子方于朝歌引車避下謁田子方

不為禮子擊因問曰富貴者驕人乎且貧賤者驕人乎
子方曰亦貧賤者驕人耳夫諸侯而驕人則失其國大
夫而驕人則失其家貧賤者行不合言不用則去之楚
越若脫躡然奈何其同之哉子擊不懌而去

史魏世家

韓詩

卷九

田子方之魏魏太子從車百乘而迎之郊太

子再拜謁田子方田子方不下車太子不悅曰敢問
何如則可以驕人矣田子方曰吾聞以天下驕人而
亡者有矣由此觀之則貧賤可以驕人矣夫志不得

則授履而適秦楚耳安往而不得貧賤乎於是太子再拜而後退田子方遂不下車

說苑尊賢魏文侯從中山奔命安邑田子方從太子擊

過之下車而趨子方坐乘如故告太子曰為我請君待我朝歌太子不說因謂子方曰不識貧窮者驕人富貴者驕人乎子方曰貧窮者驕人富貴者安敢驕人人主驕人而亡其國吾未見以國待亡者也大夫驕人而亡其家吾未見以家待亡者也貧賤者若不

得意納履而去安往不得貧窮乎貧窮者驕人富貴者安敢驕人太子及文侯道田子方之語文侯嘆曰微吾子之故吾安得聞賢人之言吾下子方以行得而友之自吾友子方也君臣益親百姓益附吾是以得友士之功我欲伐中山吾以武下樂羊三年而中山為獻於我我是以得有武之功吾所以不少進於此者吾未見以智驕我者也若得以智驕我者豈不及古之人乎

田子方侍魏文侯坐太子擊趨而入見賓客羣臣皆起
田子方獨不起文侯有不悅之色太子亦然田子方稱
曰為子起歟無如禮何不為子起歟無如罪何請為子
誦楚恭王之為太子也將出之雲夢遇大夫工尹工尹
遂趨避家人之門中太子下車從之曰子大夫何為其
若是吾聞之敬其父者不兼其子兼其子者不祥莫大
焉子大夫何為其若是工尹曰向吾望見子之面今而
後識子之心審如此汝將何之文侯曰善令太子擊前

誦恭王之言誦三遍而請習之

說苑敬慎

韓非子

田子方問唐易鞠曰弋者何慎對曰鳥以

數百目視子子以二目御之子謹周子廩田子方曰

善子加之弋我加之國鄭長者聞之曰田子方知欲

為廩而未得所以為廩夫虛無無見者廩也

漢書道家鄭長

者一篇

魏文侯見段干木立僂而不敢息反見翟璜踞堂而與

之言翟璜不說文侯曰段干木官之則不肯祿之則不

受今汝欲官則相位欲祿則上卿既受吾實又責吾禮
無乃難乎文侯可謂好禮士矣好禮士故南勝楚於連
隄東勝齊於長城虜齊侯獻諸天子天子賞文侯以上

卿

呂覽下賢
又說苑尊賢

魏文侯封太子擊於中山三年使不往來舍人趙倉唐
進稱曰為人子三年不聞父問不可謂孝為人父三年
不問子不可謂慈君何不遣人使大國乎太子曰願之
久矣未得可使者倉唐曰臣願奉使侯何嗜好太子曰

侯嗜晨鳧好北犬於是乃遣倉唐縹北犬奉晨鳧獻于
文侯倉唐至上謁曰孽子擊之使者不敢當大夫之朝
請以燕閒奉晨鳧敬獻庖廚縹北犬敬上涓人文侯悅
曰擊愛我知吾所嗜知吾所好召倉唐而見之曰擊無
恙乎倉唐曰唯唯如是者三乃曰君出太子而封之國
君名之非禮也文侯怵然為之變容問曰子之君無恙
乎倉唐曰臣來時拜送書於庭文侯顧指左右曰子之
君長孰與是倉唐曰禮擬人必於其倫諸侯無偶無所

擬之曰長大孰與寡人倉唐曰君賜之外府之裘則能
勝之賜之斥帶則不更其造文侯曰子之君何業倉唐
曰業詩文侯曰於詩何好倉唐曰好晨風黍離文侯自
讀晨風曰歎彼晨風鬱彼北林未見君子憂心欽欽如
何如何忘我實多文侯曰子之君以我忘之乎倉唐曰
不敢時思耳文侯復讀黍離曰彼黍離離彼稷之苗行
邁靡靡中心搖搖知我者謂我心憂不知我者謂我何
求悠悠蒼天此何人哉文侯曰子之君怨乎倉唐曰不

敢時思耳文侯於是遣倉唐賜太子衣一襲勅倉唐以雞鳴時至太子起拜受賜發篋視衣盡顛倒太子曰趣早駕君侯召擊也倉唐曰臣來時不受命太子曰君侯賜擊衣不以為寒也欲召擊無誰與謀故勅子以雞鳴時至詩曰東方未明顛倒衣裳顛之倒之自公召之遂西至謁文侯大喜乃置酒而稱曰夫遠賢而近所愛非社稷之長策也乃出少子擊封中山而復太子擊

說苑
奉使

韓詩

卷八魏文侯有子曰擊次曰訴訴少而立以為嗣

封擊中山三年莫往來其傅趙倉唐曰父忘子子不可忘父何不遣使乎擊曰願之未有所使也倉唐曰臣請使擊曰諾於是乃問君之所好與所嗜曰君好北犬嗜晨雁遂求北犬晨雁賫行倉唐至曰北藩中山之君有北犬晨雁使倉唐再拜獻之文侯曰擊知吾好北犬嗜晨雁也遂見使者文侯曰擊無恙乎倉唐唯唯唯而不對三問而三不對文侯曰不對何也倉唐曰臣聞諸侯不名君既賜弊邑使得小國侯君

問以名不敢對也文侯曰中山之君無恙乎倉唐曰
今者臣之來拜送於郊文侯曰中山之君長短若何
矣倉唐曰問諸侯比諸侯諸侯之朝列側者皆人臣
無所比之然則所賜衣裘幾能勝之矣文侯曰中山
之君亦何好乎對曰好詩文侯曰於詩何好曰好黍
離與晨風文侯曰黍離何哉對曰彼黍離離彼稷之
苗行邁靡靡中心搖搖知我者謂我心憂不知我者
謂我何求悠悠蒼天此何人哉文侯曰怨乎曰非敢

怨也時思也文侯曰晨風謂何對曰歟彼晨風鬱彼
北林未見君子憂心欽欽如何如何忘我實多於是
文侯大悅曰欲知其子視其母欲知其君視其所使
中山君不賢惡能得賢遂廢太子訴召中山君以為
嗣

魏文侯時西門豹為鄴令

今相州

豹往到鄴會長老問民

所疾苦長老曰苦為河伯娶婦以故貧豹問其故對曰
鄴三老廷掾常歲賦斂百姓收取其錢得數百萬用其二

三十萬為河伯娶婦與祝巫共分其餘錢當其時巫行視人家女好者云是當為河伯婦即聘取洗沐之為製新繒衣間居齋戒為治齋宮河上張緹絳帷女居其中為具牛酒飯食行十餘日共粉飾之如嫁女床席令女居其上浮之河中始浮行數十里乃没其人家有好女者恐大巫祝取之多持女遠逃以故城中益空無人又困貧所從來久矣民人俗語曰即不為河伯娶婦水來漂沒溺其人民云西門豹曰至為河伯娶婦時願三老

巫祝父老送女河上幸來告之吾亦往送女皆曰諾至
其時豹往會河上三老官屬豪長者里父老皆會觀者
二三千人其巫老女子也年七十從弟子女千人作十一
皆衣繒單衣立大巫後西門豹曰呼河伯婦來視其好
醜即將女出帷中來至前豹視之顧謂父老曰是女不
好煩大巫嫗為入報河伯得更求好女後日送之即使
吏卒共抱大巫嫗投之河中有頃曰巫嫗何久也弟子
趣之復以弟子一人投河中有頃曰弟子何久也復使

一人趣之復投一弟子河中凡投三弟子西門豹曰巫
嫗弟子是女子也不能白事煩三老為入白之復投三
老河中西門豹簪筆磬折向河立待良久長老吏傍觀
者皆驚恐西門豹曰巫嫗三老不來還奈之何欲使廷
掾與豪長者一人入趣之皆叩頭且破額血流地色如
死灰西門豹曰諾且留待之須臾豹曰廷掾起矣狀河
伯留客之久若皆罷去歸矣鄴吏民大驚恐以後不敢
復言為河伯娶婦西門豹即發民鑿十二渠引河水灌

民田田皆溉當其時民治渠少煩苦不欲也豹曰民可

樂成不可與慮始今父老子弟雖患苦我然百歲後期

令父老子孫思我言至今皆得水利民以足富

史滑稽傳補

史河渠書西門豹引漳水溉鄴以富魏之河內

魏文侯使西門豹往治於鄴告之曰必全功成名布義

豹曰敢問全功成名布義為之奈何文侯曰子往矣是

無邑不有賢豪辨博者也無邑不有好揚人之惡蔽人

之善者也往必問賢豪者因而親之其辨博者因而師

之間其好揚人之惡蔽人之善者因而察之不可以特聞從事夫耳聞之不如目見之目見之不如足踐之足踐之不如手辨之人始入官如入晦室久而愈明明乃

治治乃行

說苑
政理

西門豹治鄴廩無積粟府無儲錢庫無甲兵官無計會人數言其過於文侯文侯身行其縣果若人言文侯曰翟璜任子治鄴而大亂子能道則可不能將加誅於子西門豹曰臣聞王主富民霸主富武亡國富庫今王欲

為霸王者也臣故穡積於民君以為不然臣請升城鼓之一鼓甲兵粟米可立具也於是乃升城而鼓之一鼓民被甲括矢操兵弩而出再鼓負輦粟而至文侯曰罷之西門豹曰與民約信非一日之積也一舉而欺之後不可復用也燕常侵魏入城臣請北擊之以復侵地遂舉兵擊燕復地而後反

淮南子
人間

西門豹為鄴令清剋潔慤秋毫無私利也而甚簡左右左右因相與比周而惡之居期年上計君收其璽豹自

請曰臣昔者不知所以治鄴令臣得之矣願請璽復治
鄴不當請伏斧鑕之罪文侯不忍而復與之豹因重歛
百姓急事左右期年上計文侯迎而拜之豹對曰往年
臣為君治鄴而君奪臣璽今臣為左右治鄴而君拜臣
臣不能治矣遂納璽而去文侯不受曰寡人曩不知子
今知矣願子勉為寡人治之遂不受韓子外儲左

西門豹為鄴令佯亡其車轄令吏求之不能得乃使人
求之而得之家人屋間韓子內儲上

西門豹之性急故佩韋以自緩董安于之心緩故佩弦

以自急

韓子
觀行

李悝為魏文侯作盡地力之教以為地方百里提封九萬頃除山澤邑居三分去一為田六百萬畝治田勤謹則畝益三斗不勤則損亦如之地方百里之增減輒為粟百八十萬石又曰糴甚貴傷民甚賤傷農民傷則離散農傷則國貧善平糴者必謹觀歲有上中下熟上熟其收自四餘四百石上糴三而舍一中熟自三餘三百

石上糴二而舍一下熟自倍餘百石上則糴一使民適足賈平則止小饑則發下熟之所歛中饑則發中熟之所歛大饑則發上熟之所歛而糴之又撰次諸國法著法經以為政莫急於盜賊故始於盜律盜賊須劾捕故著囚捕二篇其輕狡越城博戲借假不廉淫侈踰制以為雜律一篇終以具律具其加減凡六篇商君受之以相秦具律今之名例律也

前漢志

魏文侯相李悝曰糴甚貴傷人甚賤傷農人傷則離散

農傷則國貧故甚貴與甚賤其傷一也善為國者使人
無傷而農益勸今一夫挾五口治田百畝歲收畝一石
半為粟百五十碩除十一之稅十五碩餘百三十五碩
食人月一碩半五人終歲為粟九十碩餘有四十五碩
碩三十為錢千三百五十除社閭嘗新春秋之祠用錢
三百餘千五十衣人率用錢三百五文終歲用千五百
不足四百五十不幸疾病死喪之費及上賦歛又未與
此此農夫所以常困有不勸耕之心而今糴至於甚貴

者也是故善平糶者必謹觀歲有上中下熟上熟其收

自四餘四百碩

大熟四倍收六百碩計人終歲長四百碩官糶三百碩此為糶三舍一也

中

熟自三餘三百碩

自三四百五十碩也終歲長三百碩官糶二百碩此為糶二而舍一也

下熟自倍餘百碩

自倍三百碩終歲長百碩官糶其五十碩云下熟糶一謂之中分百碩之

也小饑則收百碩

收三分之一

中饑七十碩

收二分

大饑三

十碩

收五分

故大熟則上糶三而舍一中熟則糶二下

熟則糶一使人適足價平則止小饑則發小熟之所歛

中饑則發中熟之所歛大饑則發大熟之所歛而糶之

故雖遇饑饉水旱糴不貴而人不散取有餘而補不足也行之魏國國以富彊

杜氏通典

李悝為魏文侯上地守而欲人之善射也乃下令曰人之有狐疑之訟者令之射的中者勝不中者負令下而人皆疾習射日夜不休及與秦人戰大敗之以人之善

戰射也

韓子內儲上

李悝警其兩和曰謹警敵人旦暮且至擊汝如是者再三而敵不至兩和懈怠不信李悝居數月秦人來襲之

至幾奪其軍此不信之患也

韓子外儲左漢書法家李子三十二篇名悝

白圭周人也當魏文侯時李克務盡地力

李克當作李悝

而白

圭樂觀時變故人棄我取人取我與歲熟取穀予之絲

漆蠶出取帛絮與之食太陰在卯穰明歲衰惡至午旱

明歲美至酉穰明歲衰惡至子大旱明歲美至卯有水

積著率歲倍欲長錢取下穀長石斗取上種能薄飲食

忍嗜慾節衣服與用事僮僕同苦樂趨時若猛獸擊鳥

之發故曰吾治生產猶伊尹呂尚之謀孫吳用兵商鞅

行法是也是故其智不足與權變勇不足以決斷仁不能以取予強不能有所守雖欲學吾術終不之告矣蓋

天下言治生者祖白圭

史貨殖傳

白圭顯於中山人惡之於魏文侯文侯投以夜光之璧

不信人讒也

鄒陽上梁王書

魏文侯見宋陵子三仕不願文侯曰何貧乎曰臣見楚富者牧羊九十九而願百嘗訪邑里故人其鄰人貧有一羊者富拜之曰吾羊九十九今君之一盈成我百則

牧數足矣鄰者與之從此觀焉富者非富貧者非貧也

金樓子

符子同

魏文侯問於解狐曰寡人將立西河之守誰可用者對
曰荆伯柳者賢人殆可文侯以荆伯柳為西河守荆伯
柳問左右誰言我於吾君者左右曰解狐荆伯柳往見
解狐而謝之曰子乃寬臣之過也言於君謹再拜謝解
狐曰言子者公也怨子者吾私也公事已行怨子如故

張弓射之走十步而沒

韓詩卷九按此等語
屢見轉相附會耳

解扁為東封

解扁魏臣治東封者

上計而入三倍有司請賞之文

侯曰吾土地非益廣也人民非益衆也入何以三倍對

曰以冬伐木而積之於春浮之何而驚之文侯曰民春

以力耕暑以強耘秋以收歛冬閒無事以伐林而積之

負輓而浮之河是用民不得休息也民以敝矣雖有三

倍之人將焉用之此有功而可罪也

淮南子人間

魏文侯問李克曰刑罰之源安生李克曰生於奸邪淫

佚之行凡奸邪之心饑寒而起淫佚者久饑之詭也雕

文刻鏤害農事者也錦繡纂組傷女工者也農事害則
饑之本也女工傷則寒之原也饑寒並至而不能為奸
邪者未之有也男女飾美以相矜而能無淫佚者未嘗有
也故上不禁技巧則國貧民侈國貧窮者為奸邪而富
足為淫佚則驅民而為邪也民以為邪因以法隨誅之
不赦其罪則是為民設陷也刑罰之起有原人主不塞
其本而替其末傷國之道乎文侯曰善以為法服也

說苑

反質

魏文侯問於李克曰為國如何對曰臣聞為國之道食
有勞而祿有功使有能而賞必行罰必當文侯曰吾賞
罰皆當而民不與何也對曰國其有淫民乎臣聞之曰
奪淫民之祿以來四方之士其父有功而祿其子無功
而食之出則乘車馬衣美裘以為榮華入則修竽琴鍾
石之聲而安其子女之樂以亂鄉曲之教如此者奪其
祿以求四方之士此之謂奪淫民也

說苑
政理

魏文侯問李克曰人有惡乎李克曰有夫貴者則賤者

惡之富者則貧者惡之智者則愚者惡之文侯曰善行此三者使人勿惡亦可乎李克曰可臣聞貴而下賤則衆弗惡也富能分貧則窮士弗惡也智而教愚則童蒙弗惡也文侯曰善哉言乎堯舜其猶病諸寡人雖不敏

請守師語矣

韓詩卷八

魏文侯問里克曰

呂覽適威篇文侯作武侯里克作李克

吳之所以亡者

何也里克對曰數戰而數勝文侯曰數戰數勝國之福也其獨亡何也里克對曰數戰則民疲數勝則主驕以

驕主治疲民此其所以亡也驕則恣恣則極物罷則怨
怨則極慮上下俱極吳之亡猶晚矣此夫差所以自喪

於干遂也

韓詩卷十 又新序
卷五 淮南子道應

吳起儒服以兵機見魏文侯文侯曰寡人不好軍旅之
事起曰臣以見占隱以往察來主君何言與心違今君
四時使斬離皮革掩以朱漆畫以丹青鑠以象犀冬日
衣之則不溫夏日衣之則不涼為長戟二丈四尺短戟
一丈二尺革車掩戶縵輪籠轂觀之於目則不麗乘之

於田則不輕不識主君安用此也若以備進戰退守而不求能用者譬猶伏雞之搏狸乳犬之犯虎雖有鬪心隨之死矣昔承桑氏之君修德廢武以滅其國有扈氏之君恃衆好勇以喪其社稷明主鑒茲必內修文德外治武備故當敵而不進無逮於義矣僵屍而失之無逮於仁矣於是文侯身自布席夫人捧觴酌吳起於廟立為大將守西河與諸侯大戰七十六全勝六十四餘則均解闢土四面拓地千里

吳子
圖國

魏文侯問李克曰吳起何如人哉李克曰起貪而好色然用兵司馬穰苴不能過也於是文侯以為將擊秦拔五城起之為將與士卒最下者同衣食卧不設席行不騎乘親裹贏糧與士卒分勞苦卒有病疽者起為吮之卒母聞而哭之人曰子卒也而將軍自吮其疽何哭為母曰非然也往年吳公呪其父其父戰不旋踵遂死於敵吳公今又吮其子妾不知其死所矣是以哭之文侯以吳起善用兵廉平盡能得士心乃以為西河守以拒

秦韓

史孫
吳傳

魏置相相田文吳起不悅謂田文曰請與子論功可乎
田文曰可起曰將三軍使士卒樂死敵國不敢謀子孰
與起文曰不如子起曰治百姓親萬民實府庫子孰與
起文曰不如子起曰守西河而秦兵不敢東鄉韓趙賓
從子孰與起文曰不如子起曰此子三者皆出吾下
而位加吾上何也文曰主少國疑大臣未附百姓不信
方是之時屬之於子乎屬之於我乎起默然良久曰屬

之子矣文曰此乃吾所以居子之上也吳起乃自知弗

如田文

史孫
吳傳

魏文侯問狐卷子曰父賢足恃乎對曰不足子賢足恃乎曰不足兄賢足恃乎曰不足弟賢足恃乎曰不足臣賢足恃乎曰不足文侯勃然作色而怒曰寡人問此五者於子皆以為不足者何也曰父賢不過堯而丹朱放子賢不過舜而瞽瞍頑兄賢不過舜而象傲弟賢不過周公而管叔誅臣賢不過湯武而桀紂伐望人者不至

恃人者不久君欲治從身始人何可恃乎

韓詩卷八

魏文侯觴大夫於曲陽飲酣文侯喟然嘆曰吾獨無豫讓以為臣蹇重舉白而進之曰臣請浮君文侯曰何以對曰臣聞之有命之父母不知孝子有道之君不知忠臣夫豫讓之君亦何如哉文侯曰善受浮而飲之嚼而不讓曰無管仲鮑叔以為臣故有豫讓之功也

說苑尊賢准

南子道應

魏文侯與大夫飲酒使公乘不仁為觴政曰飲不釂者

浮以大白文侯飲而不盡醕公乘不仁舉白浮君君視而不應侍者曰不仁退君已醉矣公乘不仁曰周書曰前車覆後車戒蓋言其危為人臣者不易為君亦不易今君已設令令不行可乎君曰善舉白而飲飲畢曰以公乘不仁為上客

說苑
善說

魏文侯燕飲皆令諸大夫論已或言君之智也至於任座任座曰君不肖主也得中山不以封君之弟而以封君之子是以知君之不肖也文侯不說知於顏色

知猶
見也

任座趨而出次及翟璜翟璜曰君賢君也臣聞其主賢者其臣之言直今者任座之言直是以知君之賢也文侯喜曰可反歟翟璜對曰奚為不可臣聞忠臣畢其忠而不敢遠其死座尚在於門翟璜往視之任座在於門以君令召之任座入文侯下階而迎之終座以為上客文侯曰微翟璜則幾失忠臣矣

呂覽自知

新序

卷一

魏文侯與士大夫坐問曰寡人何如君也羣

臣皆曰君仁君也翟璜曰君非仁君也曰子何以言

之對曰君伐中山不以封君之弟而以封君之長子
臣以此知君之非仁君文侯大怒而逐翟璜璜起而
出次至任座文侯問我何如君也任座對曰君仁君
也曰子何以言之對曰臣聞之君仁者其臣直向翟
璜之言直臣是以知之文侯曰善復召翟璜入拜為

上卿

事同而二
臣互異

魏文侯與虞人期獵明日會天疾風左右止文侯不聽
曰不可以風疾之故而失信遂自驅車往犯風而罷虞

人韓子外儲左
詳國策少異

魏文侯見箕季其牆壞而不築文侯曰何為不築對曰不
時其牆枉而不端問曰何不端曰固然從者食其園之
桃箕季禁之少焉日晏進糲餐之食瓜瓠之美文侯出
其僕曰君亦何得於箕季乎文侯曰吾一見季而得四
焉牆壞不築云待時者教我無奪農時也牆枉而不端
云固然者教我無侵封疆也從者食園桃箕季禁之豈
愛桃哉教我下無侵上也食我以糲餐者豈不能具五

味哉教我無多歛于百姓以省飲食之養也吾何無得

於季哉

新序
卷六

師經鼓琴魏文侯起舞賦曰使我言而無見違師經援
琴而撞文侯不中中旒潰之文侯謂左右曰為人臣而
撞其君其罪如何左右曰罪當烹提師經下堂一等師經曰
臣可一言而死乎文侯曰可師經曰昔堯舜之為君也
唯恐言而人不違桀紂之為君也唯恐言而人違之臣
撞桀紂非撞吾君也文侯曰釋之是寡人之過也懸琴

於城門以為寡人符不補旒以為寡人戒

說苑君道
與師曠晉平

公事
相類

十二國史 周師經仕魏文侯善鼓琴文侯耽之起
舞經怒以琴撞文侯文侯怒使人曳下殿將殺之經
曰乞申一言而死文侯曰何經曰臣撞桀紂之君不
撞堯舜之主文侯曰寡人過矣乃捨之懸琴於壁以
為戒

魏文侯出遊見路人反裘而負芻文侯曰胡為反裘而

負芻對曰臣愛其毛文侯曰若不知其裏盡而毛無所恃耶明年東陽上計錢布十倍大夫畢賀文侯曰此非所以賀我也譬無異路人反裘而負芻也將愛其毛不知其裏盡毛無所恃也今吾田地不加廣士民不加衆而錢布十倍必取之士大夫也吾聞之下不安者上不可居此非所以賀我也

新序卷二

魏文侯御廩災文侯素服辟正殿五日羣臣皆素服而弔公子成父獨不弔文侯復殿公子成父趨而入賀曰

甚大善矣夫御廩之災也文侯作色不悅曰夫御廩者寡人寶之所藏也今火災寡人素服辟正殿羣臣皆素服而弔至於子大夫而不弔今已復辟矣猶入賀何為公子成父曰臣聞之天子藏于四海之內諸侯藏于境內大夫藏于其家士庶人藏于篋櫝非其所藏者不有天災必有人患今幸無人患乃有天災不亦善乎文侯喟然嘆曰善

說苑
反質

莊周貧者往貸粟于魏文侯曰待吾邑粟之來而獻之

周曰乃今者周之來見道傍牛蹄中有鮒魚焉太息謂
周曰我尚可活也周曰須我為汝南見楚王決江淮以
溉汝鮒魚曰今吾命在盆甕之中耳乃為我見楚王決
江淮以溉我汝則求我枯魚之肆矣今周以貧故來貸
粟而曰須我邑粟來也而賜臣即來亦求臣傭肆矣丈
侯于是乃發粟百鍾送之莊周之室

說苑
善說

說苑 高平王遣使者從魏丈侯貸粟丈侯曰須吾
租收邑粟至乃得也使臣曰臣初來時見瀆中有魚

張口謂臣曰吾窮水魚命在呼吸可為灌乎臣謂之
曰待吾南見河堤之君決江淮之水灌汝口魚曰為
命在須臾及須江淮之水比至還必求吾於枯魚之
肆今高平貧窮故遣臣詣君貸粟及須租收粟至者
大王必求臣死人之墓 藝文引亦莊子西江之說
魏文侯使舍人毋擇獻鵠於齊侯毋擇行道失之徒獻
空籠見齊侯曰寡君使臣毋擇獻鵠道饑渴臣出而飲
食之而鵠飛冲天遂不復反念思非無錢以買鵠也惡

有為其君使輕易其幣者乎念思非不能拔劔刎頭腐
肉暴骨于中野也為吾君貴鵠而賤士也念思非不敢
走陳蔡之間也惡絕兩君之使故不敢愛身逃死來獻
空籠唯主君斧鑕之誅齊侯大悅曰寡人今者得茲言
三賢于鵠遠矣寡人有都郊地百里願獻于大夫以為
湯沐邑母擇對曰惡有為其君使而輕易其幣而利諸
侯之地乎遂出不反

說苑
奉使

繹史 褚少孫補史記云淳于髡獻鵠於楚又韓詩

云齊使獻鴻於楚事俱相似殆相涉亂也

二十六年號山崩壅河

三十二年伐鄭 城酸棗 敗秦於注

三十五年齊伐取我襄陵

三十六年秦侵我陰晉

三十八年伐秦敗我武下得其將識是歲文侯卒

紀年云五年

十年卒 子擊立是為武侯

以上史魏世家

紀年 魏文侯卒大風晝昏在位五十年

春秋戰國異辭卷四十二

欽定四庫全書

春秋戰國異辭卷四十三

右春坊右諭德陳厚耀撰

魏

武侯

武侯元年趙敬侯初立公子朔為亂不勝奔魏與魏襲

邯鄲魏敗而去

史魏世家

魏武侯問元年於吳子吳子對曰言國君必慎始也慎

始奈何曰正之正之奈何曰明智智不明何以見正多聞而擇焉所以明智也是故古者君始聽治大夫而一言士而一見庶人有謁必達公族請問必語四方至者勿距可謂不壅蔽矣分祿必及用刑必中君心必仁思君之利除民之害可謂不失民衆矣君身必正近臣必選大夫不兼官執民柄者不在一族可謂不權勢矣此春秋之意而元年之本也

說苑
建本

武侯問曰願聞治兵料人固國之道起對曰古之明王

必謹君臣之禮飾上下之儀安集吏民順俗而教簡募
良材以備不虞昔齊桓募士五萬以霸諸侯晉文召為
前行四萬以獲其志秦穆置陷陣三萬以服鄰敵故強
國之君必料其民民有膽勇氣力者聚為一卒樂以進
戰效力以顯其忠勇者聚為一卒能踰高超遠輕足善
走者聚為一卒王臣失位而欲見功於上者聚為一卒
棄城去守欲除其醜者聚為一卒此五者軍之練銳也
有此三千人內出可以決圍外入可以屠城矣武侯問

曰願聞陣必定守必固戰必勝之道起對曰立見且可
豈直聞乎君能使賢者居上不肖者處下則陣已定矣
民安其田宅親其有司則守已固矣百姓皆是吾君而
非隣國則戰已勝矣

吳子
圖國

武侯謂吳起曰今秦脇吾西楚帶吾南趙衝吾北齊臨
吾東燕絕吾後韓據吾前六國之兵四守勢甚不便憂
此奈何起對曰夫安國家之道先戒為寶今君已戒禍
其遠矣臣請論六國之俗夫齊陳重而不堅秦陳散而

自鬪楚陳整而不久燕陳守而不走三晉陳治而不用
夫齊性剛其國富君臣驕奢而簡於細民其政寬而祿
不均一陳兩心前重後輕故重而不堅擊此之道必三
分之獵其左右脇而從之其陳可壞秦性强其地險其
政嚴其賞罰信其人不讓皆有鬪心故散而自戰擊此
之道必先示之以利而引去之士貪於德而離其將乘
乖獵散設伏投機其將可取楚性弱其地廣其政騷其
民疲故整而不久擊此之道襲亂其屯先奪其氣輕進

速退弊而勞之勿與爭戰其軍可敗燕性慤其民慎好
勇義寡詐謀故守而不走擊此之道觸而迫之陵而遠
之馳而後之則上疑而下懼謹我車騎必避之路其將
可虜三晉者中國也其性和其政平其民疲于戰習于
兵輕其將薄其祿士無死志故治而不用擊此之道阻
陳而壓之衆來則拒之去則追之以倦其師此其勢也
然則一軍之中必有虎賁之士力輕扛鼎足輕戎馬蹇
旗斬將必有能者若此之等選而別之愛而貴之是謂

軍命其有工用五兵材力健疾志在吞敵者必加其爵
列可以決勝厚其父母妻子勸賞畏罰此堅陣之士可
與持久能審料此可以擊彼武侯曰善

吳子
料敵

武侯問曰吾欲觀敵之外以知其內察其進以知其止
以定勝負可得聞乎起對曰敵人之來蕩蕩無慮旌旗
煩亂人馬數顧一可擊十必使無措諸侯未會君臣未
知溝壘未成禁令未施三軍洶洶欲前不能欲去不敢
以半擊倍百戰不殆武侯問敵必可擊之道起對曰用

兵必須審敵虛實而趨其危敵人遠來新至行列未定
可擊既食未設備可擊奔走可擊勤勞可擊未得地利
可擊失時不從可擊涉長道後行未息可擊涉水半渡
可擊險道狹路可擊旌旗亂動可擊陳數移動可擊將
離士卒可擊心怖可擊凡若此者選銳衝之分兵繼之
急擊勿疑

吳子
料敵

武侯問曰用兵之道何先起對曰先明四輕二重一信
曰何謂也對曰使地輕馬輕車輕人人輕戰明知

險易則地輕馬芻秣以時則馬輕車膏鋤有餘則車輕
人鋒銳甲堅則人輕戰進有重賞退有重刑行之以信
審能達此勝之主也武侯問曰兵何以為勝起對曰以
治為勝又問曰不在衆乎起對曰若法令不明賞罰不
信金之不止鼓之不進雖有百萬何益于用所謂治者
居則有禮動則有威進不可當退不可追前却有節左
右應麾雖絕成陣雖散成行與之安與之危其衆可合
而不可離可用而不可疲投之所往天下莫當名曰父

子之兵

吳子
治兵

武侯問曰三軍進止豈有道乎起對曰無當天竈無當
龍頭天竈者大谷之口龍頭者大山之端必左青龍右
白虎前朱雀後玄武招搖在上從事於下將戰之時審
候風所從來風順致呼而從之風逆堅陣以待之武侯
問曰凡蓄卒騎豈有方乎起對曰夫馬必安其處所適
其水草節其饑飽冬則溫廐夏則涼廐刻剔毛鬣謹落
四下戢其耳目無令驚駭習其馳逐閑其進止人馬相

親然後可使車騎之具鞍勒銜轡必令完堅凡馬不傷於未必傷於始不傷於饑必傷於飽日暮道遠必數上下寧勞於人慎勿勞馬常令有餘備敵覆我能明此者

橫行天下

吳子治兵

二年城安邑王垣

七年伐齊至桑丘

九年翟敗我於澮 使吳起伐齊至靈丘 齊威王初

立

以上史
魏世家

武侯浮西河而下中流顧謂吳起曰

起事魏文侯時為西河守文侯卒又

事武侯

美哉乎山河之固此魏國之寶也起對曰在德不

在險昔三苗氏左洞庭右彭蠡德義不修禹滅之夏桀

之居左河濟右泰華伊闕在其南羊腸在其北修政不

仁湯放之殷紂之國左孟門右太行常山在其北大河

經其南修政不德武王殺之由此觀之在德不在險若

君不修德舟中之人盡為敵國也武侯曰善即封吳起

為西河守甚有聲名

史孫吳傳貴德

又說苑策畧同

武侯曰兩軍相望不知其將我欲相之其術如何起對
曰令賤而勇者將輕銳以嘗之務於北無務於得觀敵
之來一坐一起其政以理其追北佯為不及其見利佯
為不知如此將者名為智將勿與戰也若其衆謹譁旌
旗煩亂其卒自行自止其兵或縱或橫其追北恐不及
見利恐不得此為愚將雖衆可獲

吳子
論將

吳子 武侯問曰嚴刑明賞足以勝乎起對曰嚴明
之事臣不能悉雖然非所恃也夫發號布令而人樂

聞興師動衆而人樂戰交兵接刃而人樂死此三者
人主之所持也武侯曰致之奈何對曰君舉有功而進
饗之無功而勵之於是武侯設坐廟庭為三行饗士
大夫上功坐前行餉席兼重器上牢次功坐中行餉
席器差減無功坐後行餉席無重器饗畢而出又頒
賜有功者父母妻子於廟門外亦以功為差有死事
之家歲遣使者勞賜其父母著不忘於心行之三年
秦人興師臨於西河魏士聞之不待吏令介冑而奮

擊之者以萬數武侯召吳起而謂曰子前日之教行矣起對曰臣聞人有短長氣有盛衰君試發無功者五萬人臣請率以當之脫其不勝取笑於諸侯失權於天下矣今使一死賊伏於墻野十人追之莫不梟視狼顧何者恐其暴起而害已也是以一人投命足懼千夫今臣以五萬之衆而為一死賊率以討之故難敵矣於是武侯從之兼車五百乘騎三千匹而破秦五十萬衆此勵士之功也先戰一日吳起令三軍

曰諸吏士當從受敵車騎與徒若車不得車騎不得騎徒不得徒雖破軍皆無功故戰之日其令不煩而威震天下

尉繚子 吳起臨戰左右進劒起曰將專主旗鼓爾臨難決疑揮兵指刃此將事也一劒之任非將事也三軍成行一舍而後成三舍三舍之餘如決川源望敵在前因其所長而用之敵白者堊之赤者赭之吳起與秦戰未合一夫不勝其勇前獲雙首而還吳起

立斬之軍吏諫曰此材士也不可斬起曰材士則是也非吾令也斬之

十一年與韓趙三分晉地滅其後

十三年秦獻公縣櫟陽

十五年敗趙比蘭

吳起為魏武侯西河之守秦有小亭臨境吳起欲攻之不去則甚害田者去之則不足以徵甲兵於是乃倚一車轅於北門之外而令之曰有能從此南門之外者賜

之上田上宅人莫之徙也及有徙之者還賜之如令俄
又置一石赤菽東門之外而令之曰有能徙此於西門
之外者賜之如初人爭徙之乃下令大夫曰明日且攻
亭有能先登者仕之國大夫賜之上田宅人爭趨之於
是攻亭一朝而拔之

韓子內
儲上

吳起治西河欲諭其信於民

吳起衛人為魏
武侯西河守

夜日置表

於南門之外

表柱也

令於邑中曰明日有人僨南門之外

表者仕長大夫

長大夫上
大夫也

明日日晏矣莫有僨表者民

相謂曰此必不信有一人曰試往僨表不得賞而已何傷往僨表來謁吳起吳起自見而出仕之長大夫夜日又復立表又令於邑中如前人守門爭表表加植不得

所賞

表深植而不得其所賞

自是之後民信吳起之賞罰矣

呂覽

慎小

韓子

外儲左

吳起為魏將而攻中山軍人有病疽者吳

起跪而自吮其膿

吳起懷瘡傷者之母立泣人問曰實而吮傷

傷者之母立泣人問曰

將軍於若子如是尚何為而泣對曰吳起吮其父之

創而父死於涇水之戰今是子又將死也吾是以泣

又說苑復
恩畧同

吳起謂商文曰

吳起衛人為楚將又相魏為西河太守商文蓋魏臣

事君果有命

矣夫商文曰何謂也吳起曰治四境之內成訓教變習俗使君臣有義父子有序子與我孰賢商文曰吾不若子曰今日置質為臣其主安重今日釋璽辭官其主安輕子與我孰賢商文曰吾不若子曰士馬成列馬與人敵人在馬前援桴一鼓使三軍之士樂死若生子與我

孰賢商文曰吾不若子吳起曰三者子皆不吾若也位則在吾上命也夫事君商文曰善子問我我亦問子世變主少羣臣相疑黔首不定屬之子乎屬之我乎吳起默然不對少選曰與子商文曰是吾所以加於子之上

也

呂覽
執一

吳起出遇故人而止之食故人曰諾令返而御吳子曰待公而食故人至暮不來起不食待之明日蚤令人求故人故人來方與之食

韓子外
儲左

魏武侯謀事而當羣臣莫能逮朝而有喜色

朝一作逮
下同

吳起進曰今者有以楚莊王之語聞者乎武侯曰未也
莊王之語奈何吳起曰楚莊王謀事而當羣臣莫能逮
朝而有憂色申公巫臣進曰君朝而有憂色何也莊王
曰吾聞之諸侯自擇師者王自擇友者霸足已而羣臣
莫之若者亡今以不穀之不肖而議於朝則羣臣莫能
逮吾國其幾於亡矣吾是以有憂也莊王之所以憂而
君獨有喜色何也武侯逡巡而謝曰天使夫子振寡人

之過也天使夫子振寡人之過也

新序卷一 又荀子
堯問 又吳子圖國

略

呂覽

驕恣

魏武侯謀事而當攘背疾言於庭曰大夫之

慮莫如寡人矣立有間再三言李悝趨進曰昔者楚
莊王謀事而當有大功退朝而有憂色敢問其說王
曰仲虺有言能自為取師者王能自取友者存其所
擇而莫如己者亡今以不穀之不肖也羣臣之謀又
莫吾及也我其亡乎曰此霸主之所憂也而君獨伐

之其可乎武侯曰善

吳起行魏武侯送之絕河西與起相辭曰何以治西河

對曰以忠信

呂氏春秋

吳起治西河之外王錯譖之於魏武侯武侯使人召之
吳起治於岸門止車而休望西河泣數行而下其僕謂
之曰竊觀公之志視舍天下若舍屣今去西河而泣何
也吳起雪泣而應之曰子弗識也君誠知我而使畢
能秦必可亡而西河可以王今君聽讒人之議而不知

我西河之為秦也不久矣魏國從此削矣吳起果去魏

入楚而西河畢入秦魏日以削

呂覽觀表
又長見篇

田文既死公叔為相尚魏公主

公叔韓之公族

而害吳起公叔

之僕曰起易去也公叔曰奈何其僕曰吳起為人節廉而自喜名也君因先與武侯言曰夫吳起賢人也而侯之國小又與疆秦壤界臣竊恐起之無留心也武侯即曰奈何君因謂武侯曰試延以公主起有留心則必受之無留心則必辭矣以此卜之君因召吳起而與歸即

令公主怒而輕君吳起見公主之賤君也則必辭於是
吳起見公主之賤魏相果辭魏武侯武侯疑之而弗信
也吳起懼得罪遂去即之楚

史孫
吳傳

徐無鬼因女商見魏武侯武侯勞之曰先生病矣苦於
山林之勞顧乃肯見於寡人徐無鬼曰我則勞於君君
有何勞於我君將盈耆欲長好惡則性命之情病矣君
將黜耆欲擊好惡

擊音
牽

則耳目病矣我將勞君君有何

勞於我武侯超然不對少焉徐無鬼曰嘗語君吾相狗

也下之質執飽而止是狸德也中之質若視日上之質
若亡其一吾相狗又不若吾相馬也吾相馬直者中繩
曲者中鈎方者中矩圓者中規是國馬也而未若天下
馬也天下馬有成材若卹若佚若喪其一若是者超軼
絕塵不知其所武侯大說而笑徐無鬼出女商曰先生
獨何以說吾君乎吾所以說吾君者橫說之則以詩書
禮樂從說之則以金板六弢奉事而大有功者不可為
數而吾君未嘗啓齒今先生何以說吾君使吾君說若

此乎徐無鬼曰吾直告之吾相狗馬耳女商曰若是乎
曰子不聞越之流人乎去國數日見其所知而喜去國
旬月見所嘗見於國中者喜及期年也見似人者而喜
矣不亦去人滋久思人滋深乎夫逃虛空者藜藿柱乎

鼯鼯之逕踉位其空

踉欲行貌位處也言欲行且止

聞人足音跂然而

喜矣又況乎昆弟親戚之謦欬其側者乎久矣夫莫以

真人之言謦欬吾君之側乎

莊子徐無鬼

徐無鬼見武侯武侯曰先生居山林食芋栗厭葱韭以

賓寡人久矣夫今老邪其欲干酒肉之味邪其寡人亦
有社稷之福邪徐無鬼曰無鬼生於貧賤未嘗敢飲食
君之酒肉將來勞君也君曰何哉奚勞寡人曰勞君之
神與形武侯曰何謂邪徐無鬼曰天地之養也一登高
不可以為長居下不可以為短君獨為萬乘之主以苦
一國之民以養耳目鼻口夫神者不自許也夫神者好
和而惡姦夫姦病也故勞之惟君所病之何也

人則不
病而君

獨病之
何哉

武侯曰欲見先生久矣吾欲愛民而為義偃兵

可乎徐無鬼曰不可愛民害民之始也為義偃兵造兵

之本也君自此為之則殆不成美惡器也君雖為仁義

幾且偽哉形固造形成固有伐變固外戰

有為而形者能造其形於

外若心執定而不化則有攻伐之形心為物所變亂則有戰鬪之形

君亦必無盛鶴列於

麗譙之間無徒驥於鎬壇之宮

鶴列陣名麗譙樓名鎬壇祭祀之地言人心若

苟與物鬪則一室之內無非爭奪之境兵騎之象無之者去其心中之兵也

無藏逆於得無

以巧勝人無以謀勝人無以戰勝人夫殺人之士民兼

人之土地以養吾私與吾神者其戰不知孰善勝之惡

孰賢商文曰吾不若子吳起曰三者子皆不吾若也位則在吾上命也夫事君商文曰善子問我我亦問子世變主少羣臣相疑黔首不定屬之子乎屬之我乎吳起默然不對少選曰與子商文曰是吾所以加於子之上

也

呂覽
執一

吳起出遇故人而止之食故人曰諾令返而御吳子曰待公而食故人至暮不來起不食待之明日蚤令人求故人故人來方與之食

韓子外
儲左

春秋戰國異辭卷四十三